



Inatsisartunut ilaasortaq Jens Immanuelson, Siumut
MAANI

**Timmissanut nalunaarut nutarterniarneqarnersoq pillugu § 37 tunngavigalugu
apeqqut nr. 129-mut akissut**

26-05-2015
Sags nr. 2015-115199
Dok. nr. 1974289

Postboks 269
3900 Nuuk
Tlf. (+299) 34 50 00
Fax (+299) 34 63 55
E-mail: apnn@nanoq.gl
www.naalakkersuisut.gl

Inatsisartut suleriaasianni § 37, imm. 1, naapertorlugu Naalakkersuisut timmissat illersorneqarnerat piniagaanerallu pillugit Namminersornerullutik Oqartussat nalunaarutaat nr. 8, 2. marts 2009-meersoq iluarsartuuniarneraat imaluunniit nutarteriffiniarneraat apeqquteqarputit. Aammattaaq piniagaaffiit sivitsorneqarsinnaanerannut soqutigisaqaqatigiiffinniit saaffiginnissuteqartoqartarsimanersoq aamma apeqqutigivat. Apeqqutitit uanga suliassaqaqarfinit akineqartussanngortinneqarpoq.

- 1. Timmissat illersorneqarnerat piniagaanerallu pillugit Namminersornerullutik Oqartussat nalunaarutaat nr. 8, 2. marts 2009-meersoq nutarteriffiniarneqarpa, pingaartumik piniagaasarfii eqqarsaatigalugit, soolu nunap immikkoortuini mitit piniagaaffii eqqarsaatigalugit?**
- 2. Piniagaaffiit sivitsorneqarsinnaanerannut soqutigisaqaqatigiiffinniit saaffiginnissuteqartoqartarsimava?**

Apeqqut 1-imut)

Aap, 2014-ip aallartinnerani Aalisarnermut, Piniarnermut Nunalerinermullu (APNN) *Timmissat illersorneqarnerat piniagaanerallu pillugit Namminersornerullutik Oqartussat nalunaarutaat nr. 8, 2. marts 2009-meersoq* iluarsartuullugu sulineq aallartippaa. Suliarineqarnera nalunaarummik iluarsartuussamik missingersuummik saqqummius-sinermik kinguneqarpoq, taanna tamanut ammasumik tusarniutigineqarpoq oktober 2014-imi.

November 2014-imili qinersisoqarnera peqqutigalugu tusarniaaneq tunuartinneqarpoq. Nutaamik iluarsartuussilluni sulineq maannakkut aallartisarneqarluni ingerlaqqilerpoq, maannakkut Piniarnermut Naalakkersuisuusup kissaatai sapinngisamik ilanngunneqarnissai anguniarlugu. Sulinerup kingunerissavaa nutaamik tamanut ammasumik tusarniaasoqaqqinnissaa, anguniarneqarportaaq nalunaarut nutaaq 2015 naatinngagu atuutilersinneqarsinnaanissaa.

Apeqqut 2-mut)

Pingaarnertut KNAPK imaluunniit KNAPK-p sumiiffinni immikkoortortaqarfii timmissat aamma timmissat pillugit nalunaarut pillugu saaffiginnissuteqartarsimapput. Saaffiginnitarneq assigiinngitsunik peqquteqartarpoq appat aamma mitinut piffissat piniaffiisa ukiup ataatsip iluani sivitsorneqarnissaat pillugu saaffiginnissutigineqartarput, tunngavigineqartarput soorlu silap pissusaanut tunngasut aamma ukiumi saaffiginniffiusumi allanik isertitaqarniarnikkut periarfissat annikippallaarneri.

Saaffiginnissutit allat allannguutinik ataavarnerusumik kissaateqartuusarput, soorlu timmissanut nalunaarutip iluarsartuunneqarnissaanik kissaatit, immikkut piffissat piniarfiusut allanngortinneqarnissaat pillugu saaffiginnissutaasarlutik, annertunerusumik appat aamma mitit pineqarlutik.

Piniarneq pillugu Siunnersuisoqatigiit soqutigisaqaqatigiifinneersunik ilaasortaqqortoq tulukkat aamma naajat amerlavallaarneri soorlu eqqaaveqarfiit eqqaanni amerlavallaalertarneri oqallisigitinnikuuvaat, naajat manniinik mannissarsinnaanerup sivitsorneqarnissaani siunnersuuteqarfiusumik.

Nalunaarutissatut siunnersuutip tusarniutigineqarneranut atatillugu, tusarniaanerlu november 2014-imi suli unitsinneqannginnerani, tusarniaanermut akissuteqaatit arlallit tiguneqarput.

Pinngortitaleriffik (GN) tusarniaanermi akissuteqarpoq. Ittoqqortoormiini upernaakkut appanniarnaq unitsinneqarnissaa GN-imit innersuussutigineqarpoq, taavani appat piaqqiortut amerlassusaat annertuumik ikileriarsimanerat peqqutigalugu.

Tapertaralugu Piniartartut Aalisartartullu Kattuffiata Qeqertarsuarmi immikkoortortaqqarfia tusarniaanermut akissuteqaammimi nalunaarutigaaqat nalunaarutissatut siunnersuummi mitit aamma taateraata sakkortuvallaamik killilersorniarneqartut. Taamatullu aamma appanniarnarup millisinneqarnissaanut siunnersuut sakkortuvallaartutut taaneqarpoq. Nalunaarutigineqarpoq ilaasortat ilaannit maluginiarneqarsimasoq timmissat ukua amerlanerulersimasut: mitit, taateraata, tulukkat aamma naajat. Aammattaaq immikkoortortaqqarfik isumaqarpoq timmiarsiutinut patruunit aqerlunik amerlasuullit inerteqqutigineqalersimaneri timmissat pisarineqartartunut killilersimaarinnittoq.

Dansk Ornitologisk Forening – Qallunaat timmissat pillugit peqatigiiffiat (DOF) ilaatigut Inatsisartunut toqqaannartumik allagaqarnikuuvoq Atassutip Kitaani Tunumilu upernaakkut appanniarsinnaanerlut siunnersuutaanut atatillugu. DOF-ip kissaatigaa appat tamakkiisumik illersorneqarnissaat appaqassutsip kinguariarsimaneera tunngavigalugu.

Kattuffiit tamarmik tusarniaanermut akissuteqarsimangillat, tusarniaaneq piffissaq killigititaq naatinngalu unitsinneqarmat.

Saaffiginnissutaasut allat tassaapput soorlu Mittarfeqarfiit, immikkut akuerineqarnissamik kissaateqarsimasut aammalu akuerineqartarsimavoq naajat tulukkallu mittarfiit imaluunniit heliportit eqqaaniittunik toqoraanissamat/ikilisaanissamat, timmisartornerup isumannaatsuunissaanut ulorianartorsioertitsinerat peqqutigalugu. Mittarfeqarfinnut immikkut akuersissutigineqartartut ukiut tallimat tikillugit atuuttarput.

KNAPK-p sinerissami immikkoortortaqqarfiiniit 2014 sioqqullugu appat aamma mitinut piffissat piniagaaffiitut tunngatillugu saaffiginnissuteqartoqartarsimavoq. Saaffiginnissutit Nuuk, Sisimiut, Kangersuatsiaq aamma Upernavimmeersuupput.

Assersuutigalugu Upernavimmiit appat aamma mitinut piffissat piniagaaffiisut sivitsorneqarnissaat kissaatigineqarsimavoq. Isumaqqortoqarmat piffissat piniarfiusut aallartikkaangata timmissat kujammut ingerlaalereersartut, aamma timmissat sumiiffiminnut tikiukkaangata piffissat piniarfiusut qaangiutereertarnerat peqqutigalugu.

Kangersuatsimiit upernaakkut maj qaammat appanniarsinnaanermut immikkut akuerineqarnissamik qinnutigineqarnikuuvoq. KNAPK-p sumiiffimmi immikkoo-tortaqarfiata uparuarpa piujuaannartitsinermik tunngaveqartumik appanniarneq ingerlassinnaallugu. Appat Kangersuatsiap eqqaanut maj qaammat tikiuttarput, aamma appanniarneq maj naajartornerani ingerlanneqarsinnaasoq, juni-mi piaqqiorlutik aallartittarmata.

Sisimiuni Umiatsiaararsorlutik Aalisartut Piniartullu Peqatigiiffiat siusinnerusukkut, ukioq ataatsimut atuuttumik, appat mitillu ukiakkut ukiukkullu piniagaanerisa qaammammik ataatsimik sivitsorneqarnissaat immikkut akuerineqarnissaa qinnutigineqarnikuuvaat. Qinnuteqarnermut tunngaviuvoq ukiumi pineqartumi sikup aamma silap unerisimanggin-nerujussua.

Nuummi Aalisartut Piniartullu Peqatigiiffiat appat piniagaaneri qaammammik ataatsimik martsip naaneranut sivitsornissaa kiisalu mitit aprilip naanissaanut sivitsorneqarnissaat qinnutigineqarnikuuvaat. Qinnuteqarnermut tunngavineqarpoq piniakkat pingaarnertut isertisiffigineqarsinnaasut februaarip naanerani piniagaaneri uninnerat. Piniakkat pineqartut ukiumi pineqartumi tassaaput soorlu ukiuunerani tuttunniarneq kiisalu appat februaarip naanerani piniagaanerisa uninnerat, peqatigiiffiup ilaasortaasa isertitaqarnerannut malunnaatilimmik appariarnerannik kinguneqartumik.

APNN kingullertigut Qaasuitsup Kommuniani Aalisarnermut Piniarnermullu Ataatsimiititaliaanit saaffigineqarpoq, kommunimit qinnutigineqarluni Qaanaap aqutsiveqarfiani kangoq piniarneqarsinnaanissaa pillugu.

Soorlu qulaani allaaserineqarneratut saaffiginnissutit amerlanerpaartaat appat aamma mitit annertunerusumik piniarneqarsinnaanissaanut tunngatillugu saaffiginnissutaapput.

Inussiarnersumik inuulluaqqusillunga

Karl-Kristian Kruse